

Nuummi Imarsiornermik Ilinniarfimmum ininik attartuinnarani, Namminersorlutik Oqartussat tassunga illussamik sanatitsigunik, piginnittuugunillu siunissamut ungasinnerusumut naleqqunnerussanersoq pillugu nassuiaasiornissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut. Attartuinnarnermut nallersuullugu piginnittuunermi aningaasatigut, allaffissornikkullu kingunissaannik nassuiaat misissueqqissaarnertaqassaaq. (Inatsisartunut ilaasortaq Bo Martinsen, Demokraatit)

Akissuteqaat

(Ilinniartitaanermit, Kultureqarnermit, Timersornermit Ilageeqarnermullu Naalakkersuisoq)

Siullermeerneqarnera

Inatsisartunut ilaasortaq Bo Martinsen, Demokraatit, aalajangiiffigisassatut siunnersuuteqarsimaneranut Naalakkersuisut aallarniutigalugu qujaffigerusuppaat.

Imarsiornermik ilinniarfiup inissisimaffianik attartuinnarnermi, Namminersorlutik Oqartussaniit nammineq pigisamik ilinniarfiornermi aningaasartuutaajumaartunik kingunerisassaanillu erseqqissaanermik suliaqartoqassasoq siunnersuuteqartoq Naalakkersuisut isumaqatigaat.

Taamaaliornikkut anguniagaavoq, siumut isigalugu suna aningaasaqarnikkut aaqqiissuteqarnermi orniginarnerpaajunersoq nalilersorsinnaajumallugu Inatsisartut aalajangiinissamut tunngavissaannik qulakkeerinninnissaq.

Naalakkersusiut naliliipput, ilinniarfik ilinniarnermut naleqqussarneqarsimallunilu siunnerfilik, ullumikkorniit annertunerusumik ilinniartitaanernik nutaanik ineriartortitsinissamut, imarsiornermillu iliniartitaanerit pioreersut nukittorsarneqarnissaannut periarfissiinerusinnaasoq. Tamatumani kingunerisassaa tassaavoq, nunatsinni pingaarnertut inuussutissarsiutip, imarsiornermik aalisarnermillu inuussutissarsiuteqarnerup, nukittorsaavigineqarnera.

Imarsiornermik ilinniarfik Nuummiittoq pillugu § 37 naapertorlugu apeqqummut (Nr. 20-2026) - Naalakkersuisut ersarissumik isumaqartut; imarsiornikkut ilinniartitaanernut ullumimut naleqquttumik nutaaliaasumillu ilinniarfeqartariaqartoq, ilinniarfimmi ilinniartitaanerit ineriartornerannut ikorfartuisumik qulakkeerinninninnaasumillu. Ullumikkut imarsiornermik ilinniartitaanerit ungasinnerusoq isigalugu imatut inissisimapput; siunissami ilinniartitaanernut ineriartortitsiviusinnaalluartumik ilinniarfimmik sinaakkuteqaratik, taamaattumillu ilinniartitaanerit ilinniarfimmi nutaaliaasumi ullumimullu tulluarsakkamik ineriartorfiusumillu aallulluarneqarsinnaanatik – nunat allat imarsiornermik inuussutissarsiuteqarfiusut assigalugit.

Tamannalu allangortittariaqarpoq. Naalakkersuisut Imarsiornermik ilinniarfimmi pissutsit pitsannorsarneqarnissaat piaartumik sulissutigisavaat, imarsiornikkut aalisarnikkullu inuussutissarsiutinut siunissami aamma iluaqutaasussamik.

Naalakkersuisunut pingaaruteqarpoq, ungasinnerusoq isigalugu Imarsiornermik ilinniarfimmuut aaqqiissutissaq ajunnginnerpaaq Inatsisartunut saqqummiutissallugu.

Taamaattumik oqaaseqaatit qulaani taaneqartut tunngavigalugit aalajangiiffigisassatut siunnersuut akuerineqassasoq Naalakkersuisut inassutigaat.